



Til medlemene i Råd for menneske med nedsett funksjonsevne

Det vert med dette kalla inn til / gjort kjent med møte i Råd for menneske med nedsett funksjonsevne

Møtestad: Møterom 1, Kommunehuset

Dato: 09.05.2017

Tid: 13:00

Dersom De ikkje kan møte, ber ein om at De melder frå til sentralbordet snarast råd.

Saksliste

Utvals- saksnr	Innhald	Lukka
	Saker til handsaming	
PS 3/17	Høyring - Kommunal forskrift sjukeheim	

Saker til handsaming

PS 3/17 Høyring - Kommunal forskrift sjukeheim



Seljord kommune

Arkiv: J44
Saksnr.: 2017/949-2
Sakshand.: Rolf Henning Jensen
Direkte tlf.: 35065106
Dato: 02.05.2017

Saksframlegg

Utval	Utvalssak	Møtedato
Eldreråd	3/17	09.05.2017
Råd for menneske med nedsett funksjonsevne	3/17	09.05.2017

Høyring - Kommunal forskrift sjukeheim

Saksdokument:

Høyringsdokument - Kommunal forskrift sjukeheim
Kommunal forskrift sjukeheim - 2017

Saksutgreiing:

Orientering om Høyringsdokument - Kommunal forskrift sjukeheim og Kommunal forskrift sjukeheim – 2017.

Høyringsdokumentet vert annonsera i Vest-Telemark Blad fredag 5. mai og tysdag 9. mai 2017.

Rådmannen si tilråding:

Saka vert lagt fram utan tilråding.

Høyringsdokument

Kommunal forskrift om rett til langtidsopphald i sjukeheim eller plass i særskilt bustad tilrettelagd for heildøgns tenester.

Bakgrunn for saken

Den 13.juni 2016 vedtok Stortinget nokre endringar i pasient- og brukerrettighetsloven § 2-1 og helse og omsorgstjenesteloven § 3-2.

Grunnlaget for lovvedtaket er Prop.99 L (205-2016) og Innst.372 L (2015-2016). Lovendringane vart sett i kraft frå 1.juli 2016, mens kommunane har verte pålagd å utarbeide ein eigen forskrift knyta til lovendringa innan 1. juli 2017.

Kva er gjeldande rett og kva er nytt?

Pasient eller brukar har etter gjeldande pasient- og brukerrettighetslov ein rett til opphald i sjukeheim eller bustad med heildøgns omsorgstenester, dersom det etter ein helse- og omsorgsfagleg vurdering er det einaste kommunale tilbodet som kan sikre pasienten og brukaren naudsynte og forsvarlege helse- og omsorgstenester. Dette er ved lovendringa presisera i lovens § 2-1 e, fyste lekk.

Og kommunen si plikt til å tilby slike tenester er også presisera i helse- og omsorgstjenesteloven § 3-2 a fyste lekk. I slike høve har kommunen plikt til å tilby pasienten eller brukaren heildøgns plass direkte og han/ho kan ikkje verte sett på ei venteliste.

Den viktigaste lovendringa frå juni 2016 gjeld helse og omsorgstenestelovas § 3-2, andre, tredje og fjerde lekk, som har fått fylgjande ordlyd:

«Kommunen skal gi forskrift med kriterier for tildeling av langtidsopphold i sykehjem eller tilsvarende bolig særskilt tilrettelagt for heldøgns tjenester. Forskriften skal også omfatte pasienter og brukere som vil være best tjent med langtidsopphold, men hvor kommunen vurderer at vedkommende med forsvarlig hjelp kan bo hjemme i påvente av langtidsopphold. Forskriften skal videre regulere hvordan kommunen skal følge opp pasienter eller brukere som venter på langtidsopphold.

Kommunen skal treffe vedtak om kriteriene etter andre ledd er oppfylt. Kommunen skal føre ventelister over pasienter og brukere som venter på langtidsopphold etter andre ledd.»

Lovendringane er såleis langt på veg berre ein presisering av gjeldande rett og inneber inga utvida juridisk rett for pasienten/ utvida plikt for kommunen i høve til å få tildela sjukeheims plass samanlikna med slik det har vore til no.

Kva endringa faktisk betyr

Det som likevel er nytt med denne lovendringa er at kommunen no har fenge ein plikt til å utarbeide ei kommunal forskrift, der kriterier for tildeling av langtidsopphald i sjukeheim eller tilsvarande bustad lagt til rette for heildøgns tenester skal gjerast tydeleg.

Forskrifta skal ikkje minst omfatte pasientar og brukarar som vil vere best tente med eit langtidsopphald, men der kommunen vurderer at vedkommande med forsvarlege tenester likevel vil kunne bu heime i påvente av langtidsopphald.

Vidare inneber endringa at pasient og brukar i slike høve skal ha krav på eit eige vedtak, der det gjeng fram at det ligg føre ein rett til plass, men at slik plass likevel ikkje fins tilgjengeleg på tidspunkt for vedtaket.

Tilsvarande er det også nytt at kommunen vert pålagt å sette vedkommande med slikt vedtak på ei venteliste. Lovendringa inneber dessutan at kommunen har fenge ein plikt til løpande å vurdere dei på venteliste i høve til å tildele plass, kvar gong det blir ledige sjukeheimsplassar i kommunen. Det er likevel presisera frå lovgjevars side, at det å stå på ei slik venteliste ikkje inneber noko fortrinn til å få tildela plass, i høve til andre pasientar som ikkje stend på ei slik venteliste.

Føremålet med ei kommunal forskrift.

Ei kommunal forskrift skal primært ha som føremål å tydeleggjere retten til sjukeheimsplass eller retten til opphald i tilsvarende bustad med heildøgns omsorgstenester for innbyggjarane. I tillegg skal ei kommunal forskrift bidra til å konkretisere dei kriteria som kommunen legg til grunn for å tildele plassar.

Høyring

Seljord kommune skal sjå til at forskrifta er så godt opplyst som mogleg før den blir vedteken av kommunestyret, jfr. forvaltningslovas § 37. Innhenting av synspunkt og høyringssvar frå ulike partar er difor ein del av høyringa.

Dette er ein open høyring som alle kan svare på, både organisasjonar og privatpersonar. Oversikt over høyringsinstansar gjeng fram av dette høyringsdokumentet, sjå under.

Forslaget til forskrift for tildeling av langtidsopphald i sjukeheim i Seljord kommune, som denne høyringa omfattar, er tilgjengeleg på vår nettside www.seljord.kommune.no.

Høyringsfrist

Eventuelle høyringsuttaler vert sende skriftleg **innan 1. juni 2017** til post@seljord.kommune.no eller til Seljord kommune, Brøløvsvegen 13 A , 3840 Seljord og vert merka med «Høyring – rett til

sjukeheimsplass». Dersom du har nokre spørsmål, kan du ta kontakt med kommunalsjef for helse og omsorg Rolf Henning Jensen på mobil 951 80617 eller epost rolf.jensen@seljord.kommune.no

Vedtak og kunngjering

Seljord kommune har ansvar for at alle høyringssvara vert vurdert og at forslaget til forskrift eventuelt vert endra grunna høyringa. Endeleg forslag til forskrift vil etter planen bli handsama av Seljord kommunestyre den 15. juni 2017. Etter det vert forskrifta registrera i Norsk lovtidende, og skal etter planen tre i kraft den 1. juli 2017.

**FORSKRIFT OM RETT TIL LANGTIDSOPPHALD I SJUKEHEIM ELLER SÆRSKILT
BUSTAD TILRETTELAGD FOR HEILDØGNS TENESTER.
KRITERIAR FOR TILDELING OG VENTELISTE.**

SELJORD KOMMUNE

§ 1. Føremål

Føremålet med forskrifta er å få oversyn over pasientar og brukarar med behov for langtidsopphald, og bidra til forutsigbarheit og openheit kring kriteriar og tildelingsprosess for langtidsopphald i sjukeheim eller særskilt bustad tilrettelagd for heildøgns tenester i Seljord kommune.

§ 2. Virkeområde

Forskrifta er heimla i pasient- og brukerrettighetsloven § 2-1e om rett til langtidsopphald i sjukeheim eller tilsvarende bustad særskilt tilrettelagd for heildøgns tenester.

Tilsvarende er forskrifta også heimla i helse og omsorgstjenestelovas § 3-2 a, der kommunen vert pålagd å utarbeide kriteriar for tildeling, etablere ei venteliste for pasientar og brukarar som har rett til slik plass, men som likevel i påvente av ledig plass kan få dekkja sitt behov på ein forsvarleg måte med andre tenester i heimen. Loven seier også at kommunen i forskrifta skal syne ei prosedyre for oppfylgning av pasientar og brukarar på venteliste.

§ 3. Grunnlag for vurdering og tildeling av langtidsplass

Seljord kommune nyttar lågaste effektive omsorgsnivå (LEON) som prinsipp ved tildeling av tenester og tiltak i omsorgstrappa. Omsorgstrappa har tenester på ulike nivå der aukande behov for hjelp vert møtt med aukande og meir omfattande tenestetilbod av ulik art. Tenester på lågare nivå skal som hovudregel vere forsøkt før tildeling av langtidsplass i sjukeheim.

Vurdering av behovet for helsehjelp skjer via kartleggingsverktøyet IPLOS, samanstilt med kommunens faglege vurdering. IPLOS er eit lovpålagt helseregister med data som beskriv bistandsbehov og ressursar til dei som søkar eller mottek kommunale helse- og omsorgstenester.

Ved vurderinga vert det lagt vekt på søkars:

- A. Helsetilstand
- B. Mentale tilstand
- C. Kognitiv svikt
- D. Evne til eigenomsorg
- E. Butilhøve
- F. Sosialt nettverk/familie og deira omsorgsevne

Pasienten og brukaren skal medverke ved utforminga av tenestetilbodet, jf. pasient- og brukerrettighetsloven § 3-1.

§ 4. Kriteriar for tildeling av langtidsplass i sjukeheim eller bustad særskilt lagt til rette for heildøgns tenester.

For å bli tildela langtidsopphald må pasient eller brukar vere varig ute av stand til å ta vare på seg sjølve og ikkje lenger mestre dagliglivets krav på grunn av mentalt eller fysisk funksjonstap.

Pasient eller brukar må ha eit omfattande behov for helse – og omsorgstenester og ikkje kunne få dekkja sine daglige behov på ein forsvarleg måte ved andre tenester i eigen heim.

Under kriteriet «omfattande behov», vert det gjort ein total vurdering av funksjonsnivået og eigenomsorga til pasient og brukar, m.a. i høve til:

- Samansett sjukdomsbilete
- Kognitiv svikt/langtkomen demens
- Ernæring
- Legemiddelhandtering
- Fallrisiko
- Hyppige innleggingar i spesialisthelsetenesta (sjukehus)
- Psykisk helse
- Vesentleg svikt i eigenomsorg

§ 5. Rett til vedtak

Kommunen skal fatte vedtak om langtidsopphald når det er forsvarleg at pasient eller brukar med omfattande behov for heildøgns helse – og omsorgstenester får dekkja sitt hjelpebehov ved å bu i eigen heim. Dette i påvente av langtidsopphald i sjukeheim eller bustad særskilt lagt til rette for heildøgns tenester.

Vedtaket skal i dette høve opplyse om at vedkommande er kvalifisera for langtidsopphald og at han/ho førebels blir sett på ei venteliste i kommunen, jf. § 6 i forskrifta.

Pasient og brukar har rett til å klage på slikt vedtak, jf. pasient – og brukerrettighetsloven § 2-7 andre lekk og § 7-2.

§ 6. Venteliste

Dersom søker fyller kriteria for langtidsopphald, men kan få forsvarlege helse- og omsorgstenester i eigen heim i påvente av eit slikt tilbod, skal kommunen setje søker på ei venteliste. Ved ledig plass skal den med størst hjelpebehov ut i frå kriteriane i § 4 prioriterast. Det gjev såleis inga fortrinn til langtidsplass det at ein er sett på ei slik venteliste.

Tenestekontoret har ansvar for å halde oversyn over personar som ventar på langtidsplass.

§ 7. Tiltak i ventetid på langtidsopphald

Personar med vedtak og som ventar på langtidsplass i sjukeheim eller særskilt bustad tilrettelagt for heildøgns omsorg, skal få andre tenester for å sikre naudsynt og forsvarleg helsehjelp i ventetida. Dette kan til dømes vere meir heimesjukepleie, heimhjelp/praktisk bistand, dagsenter, korttidsopphald og/eller andre tenester i omsorgstrappa. I høve der det er

nære pårørende som har hovudansvaret for å gje omsorg, skal desse eventuelt få tilbod om avlastning/omsorgsløn.

Pasientar/brukarar på venteliste skal vurderast løpande med sikte på tildeling av plass kvar gong kommunen har ledig plass. Vurderinga vert gjort i samarbeid mellom tenestekontoret og den/dei avdelingane som yter tenester til den einskilde brukaren.

§ 8. Ikrafttredelse

Forskrifta trer i kraft 1. juli 2017.